

Jahresbricht vom Tanze 2009

44 Mau si d'Tanzlüt im 2009 zämecho. 38 Mau hei si probet u 6 Mau si sy öffentlech ufträtte.

Scho am 9. Januar si ds Vreni Wiedmer u d'Brigitta Grünig a ds erschte vo vierne Tanzleitertanze gange. Sy si wieder flissig ga nöii Tänz lehre.

Am Wochenänd vom 17. u 18. Januar si 6 Tanzfroue, i ds Gwatt ga schnuppere u lehre, was i dr Voukstanzwäut Nöis isch usecho. Äs isch geng es schöns Erläbnis, di vertroute Gsichter us dr Bärnische Trachtevereinigung wieder mau z'gseh.

Am 13. März si paar Tanzfroue i ds Rest. Tell nach Ostermundige gah d'DV vor Trachtevereinigung Landesteil Mittelland bsueche, für di nöischte Informatione z'vernäh.

O i diesem Jahr si während zwöine Mau äs paari vor Tanzgruppe a ds „Tanze für aui“ nach Gümlige gfahre Dä Anlass isch vor Tanzleitig Mittelland düregführt worde.

Am 03. April het Trachtegruppe Belp zum Regionauträffe iglade. Im Rest Kreuz z'Belp si i däm Jahr o Tanzgruppe vom Längebärg iglade gsi. Trachtetänz si vo dr Ländlerkappäue Ulmizbärg begleitet worde.

Es isch dr 26. April wo di drei Froue Brigitta Grünig, Kathrin Hirschi u ds Vreni Brönnimann bi bedecktem Himmu am Morge bezyte uf Port bi Biel fahre. Dert findet hüt ds Bott vo dr Bärnische Trachtenvereinigung statt. Nachem Begrüessigskaffee mit Gipfeli cha dr Obmaa Heinz Wüthrich ds Bott eröffne. Ohni viu Diskussione si aui Traktande im Sinn vom Vorstand über d'Bühni gange. Ds abträtende kant. Tanzleiterpaar Julia Brühlhard u Res Marti wärde Ehrenmitglieder. Käthi Bähler vo Wattwil u d'Brigitte Christen vo Rüscheegg, so heisst z'nöi gwählte Tanzleiterpaar. Nach eme feine Mittagässe isch mit ere intressante Polonaise dr Tanznamittag uf em Raseplatz eröffnet worde.

Am feschtliche Tanzabe am 23. Mai im Casino z'Bärn hei 5 Tanzfroue vo Gurzele teilgno. Zur lüpfegi Musig vo de Ländlerfründe Gantrischsee hei Tanzfroue vo dr Bärnische Trachtevereinigung ds Tanzbei gschwunge. Freiburg isch dr Gaschkanton i diesem Jahr gsi. Ä Tanzgruppe us Polen het schwungvoll tanzet u Lieder us ire Heimat idrücklech vortrage.

Ds Tanzleiterträffe am 25. Oktober z'Gümlige het us üser Gruppe nume d'Brigitta Grünig, bsuecht. Ds Vreni Wiedmer, wo süsch ja geng derbi isch, het leider scho e angere Termin i dr Agenda gha. D'Brigitta het e Tanzkollegin us ere angere Tanzgruppe mitgno. Mir schetzes sehr, dass ds Vreni u d'Brigitta immer Zyt näh u d'Geduld hei, u mit üs auti Tänz uffrüsche u nöii Tänz istudiere. Für das danke mir ihne viu mau.